

15 IULIE
RUGACIUNEA 4
SF.CNEAZ
VLADIMIR-VASILE CEL MARE
AL RUSIEI

Молитва

Како похвалим тебе, в земных владыках премужественный, Владимире? Како ти благодарение воздадим, яко тобою познахом Господа и лести идольския избыхом, яко твоим повелением по всей земли Христос славится? Како веровал еси? Како взыскал еси Христа? Повеждь нам, рабом твоим, откуда ти припахну воня Святаго Духа? Не видел еси Христа, ни ходил еси по Нем, како ученик Его обретесе? Не видел еси апостола, пришедша в землю твою, не видел бесы изгоняюща Именем Христовым, болящих исцеляюща, мертвых воскрешающа. Дивное чудо! Инии царие и властителие, видяще вся сия, бывающа от святых муж, не вероваша, но паче на страсти и муки предаша их, ты же, о блаженне, не видя и не слыша всех сих, притекл еси ко Христу, разумев, яко Един есть Творец невидимым и видимым, Небесным и земным, и

яко посла в мир, нашего ради спасения,
Возлюбленного Своего Сына. И сия помыслив,
вшел еси во святую купель.

И ныне, протекшим тысящи летом от
Крещения Руси, призри на землю твою виждь
чада твоя. Виждь люди твоя, како живут, како
храними суть Господем, како благоверие хранят
по преданию твоему, како славят Христа, како
покланяются Имени Его. Виждь и грады,
величеством сияющия, виждь церкви цветущия,
виждь христианство растущее, виждь и град
твой Киев, толикими угодники Божиими, во
нетлении почивающими, блистающийся, и
фимиамом благоухаем, и хвалами и
божественными пении святыми оглашаем. И сия
вся виде, возрадуйся и возвеселися и похвали
Благого Бога, всем сим Строителя.

Видя, яко твое верное сеяние твоим
ходатайством и заступлением не изсушено бысть
зноем неверия, но дождем Божию поспешения
расположено бысть многоплодне, радуйся духом,
во владыках апостоле, не мертвая телеса
воскресивый, но душею ны, мертвыя,
воскресив! Радуйся, утешителю наш и
наставниче благоверия! Ты бе, о честная главо,
нагим одеяние, алчным кормитель, жаждущим
утроб охлаждение, вдовицам помощник,

странным покоем, обидимым заступник,
убогим обогащение.

Сим благим делом на Небесех возмездие
приемля и зрения сладкаго лица Божия
насыщаяся, не престай моляся о земли твоей и о
чадах, в них же благоверно владычествова, да
славится в земли нашей выну правоверие и да
не оставит нас Господь, аще и еще блуждаем,
толиким веком протекшим, аще и еще
согрешаем Господу и Владыце нашему, аки
новокупленнии раби, во всем неугодыще
господину своему. К тебе руки наша воздеваем и
молим тя: помолися Владыце всех, да продлит,
донележе стоит мир, милость Свою на
отечествии нашем и людех Своих, ратныя
прогоняя, мир утверждая, глад угобзая, грады
разселяя, Церковь Свою возвращая, достояние
Свое соблюдая, мужи, и жены, и младенцы
спасая, да милостию Его носими, в единении
веры вкупе весело и радостно славим Господа
нашего Иисуса Христа, со Отцем и со
Пресвятым Духом, Троицу Нераздельну
Единобожественну, царствующу на Небесех и на
земли, ныне, и присно, и во веки веков. Аминь.